



सिखावन माने सीखे के बात या शिक्षा। ये पाठ म संकलित नौ ठन दोहा म कवि ह नौ ठन शिक्षा दे हवय। पहिली के सियान मन अपन जिनगी के अनुभव अपन पाछू के पीढ़ी ल सउप देवँय। इही किसम ले ज्ञान के भंडार ह भरत रहय। इही अनुभव अउ ज्ञान के बात सिखावन कहे जाय।

का होंगे के रात हे, घपटे हे अँधियार ।  
आसा अउ बिसवास के, चल तँ दीया बार ।

एके अवगुन सौ गुन ल, मिलखी मारत खाय ।  
गुरतुर गुन वाला सुवा, लोभ करे फँद जाय ।

मीठ—लबारी बोल के, लबरा पाये मान ।  
पन सतवंता ह सत्त बर,हाँसत तजे परान ।

घाम — छाँव के खेल तो,होवत रहिथे रोज ।  
एकर संसो छोड़ के, रद्दा नावा तँ खोज ।

लाखन — लाखन रंग के, फुलथे फूल मितान ।  
महर — महर जे नइ करे, फूल अबिरथा जान ।



सब ला देथे फूल — फर,सब ला देथे छाँव ।  
अइसन दानी पेड़ के, परो निहरके पाँव ।

तँ किताब के संग बद, गंगाबारू,मीत ।  
एकरे बल म दुनिया ल,पक्का लेबे जीत ।

ठाड़े — ठाड़े नइ मिले,ठिहा ठिकाना — सार ।  
समुँद कोत नँदिया चले, दउड़त पल्ला मार ।

हे उछाह मन म कहूँ , पाये बर कुछु ज्ञान ।  
का मनखे ? चाँटी घलो,पाही गुरु के मान ।

## छत्तीसगढ़ी शब्द मन के हिन्दी अर्थ

|                              |                                       |
|------------------------------|---------------------------------------|
| का होंगे = क्या हो गया,      | मितान = मित्र                         |
| घपटना = सघनता के साथ छा जाना | महर-महर = सुगंध से महकना              |
| अँधियार = अंधकार             | नइ = नहीं                             |
| आसा = आशा                    | अबिरथा = बेकार                        |
| बिसवास = विश्वास             | निहरके = झुककर                        |
| बारना = जलाना                | बदना = (क्रिया)अनुष्ठान के साथ मानना  |
| मिलखी मारत = पलक झपकते ही    | (संज्ञा)मनौती                         |
| गुरतुर = मीठा                | एकरे = इसी का                         |
| फँद जाना = फँस जाना          | पक्का = निश्चित                       |
| लबारी = झूठ                  | ठिहा-ठिकाना = मंजिल,गन्तव्य           |
| लबरा = झूठा                  | सार = निचोड़                          |
| सतवंता = सत्यवादी            | समुंद = समुद्र                        |
| सत बर = सत्य के लिए          | कोत = तरफ,ओर                          |
| परान = प्राण                 | पल्ला मारना = तेज गति के साथ (दौड़ना) |
| घाम = धूप                    | उछाह = उत्साह                         |
| संसो = चिन्ता                | चाँटी = चींटी                         |
| रद्दा = रास्ता               | घलो = भी                              |
| नवा = नया                    |                                       |
| लाखन-लाखन = लाखों-लाख        |                                       |

### अभ्यास

#### पाठ से

1. हमन ला चाँटी ले का-का सिखावन मिलथे ओरिया के लिखव ।
2. 'ठाढ़े-ठाढ़े ठिहा-ठिकाना नइ मिलय'-एमा कवि के भाव ल बने अरथा के लिखव ?
3. काकर बल म ये दुनिया ल जीते जा सकत हे, अउ 'दुनिया ल जीतना' के का अर्थ हे ?
4. पेड़ ल दानी काबर कहे गो हवय ?

5. 'घाम-छाँव के खेल' के अर्थ ल बने समझ के लिखव ?
6. 'रात' अउ 'अँधियार' के अर्थ कवि के अनुसार का हो सकत हे ?
7. 'आसा अउ बिसवास के दिया बारना' के भाव ल लिखव ।

### पाठ से आगे



1. एके अवगुन सौ गुन ल, मिलखी मारत खाय ।  
गुरतुर गुल वाला सुवा, लोभ करे, फँद जाय ।।  
इसका संदर्भ क्या हो सकता है व इससे आप कहाँ तक सहमत है। विचार कर लिखिए।
3. जीवन भर आसा अउ बिसवास ल कवि ह जरूरी बताय हे। का तुमन घलव वइसने सोचथन बिचार करके लिखव।
4. नवा रद्दा खोजे ले जीवन म का-का परिवर्तन हो सकथे, अपन कक्षा के दू समूह बनाके सोचव अउ लिखव।
5. "अगर दुनिया में किताब या किताब लिखइया नइ होतिन ता का होतिस।" ए विषय में 10 लाइन लिखव।
6. सीख के अइसनेहे दोहा मन ल सकेल के लिखव।

### भाषा से

1. कविता अउ लेख के भाषा म बड़ अंतर होथे। कविता के भाषा अउ लेख के भाषा ल पढ़व अउ गुनव। कविता म शब्द भले कमती होथे, फेर ओकर अर्थ ह बड़े होथे। एमा कमती शब्द म बड़ गहरी बात ल कहे के उदिम कवि ह करे रहिथे। एकरे सेती कविता के शब्द म लुकाय भाव अउ विचार ल बने देखे अउ समझे ल परथे। एकर छोड़, कवि ह अपन भाषा ल गहना-गुरिया घलो पहिराथे, तेला 'अलंकार' कहे जाथे। जइसे-  
अ. आसा अउ बिसवास के दीया ।  
ब. गुरतुर-गुन ।  
पहिली डाँड़ ल पढ़व अउ गुनव। दिया ह माटी के बनथे, फेर कवि ह आसा अउ बिसवास के दिया बनाय हे। एकर माने, कवि ह आसा अउ बिसवास ल दिया के रूप दे हवय। ये ह 'रूपक' अलंकार के उदाहरण आय।



अब दुसरइया म दू शब्द के जोड़ी हवय-गुरतुर अउ गुन। दूनो शब्द के शुरु ह 'ग' अक्षर ले होय हे। अइसन प्रयोग ल 'अनुप्रास अलंकार' कहिथें।

अपन शिक्षक ले पूछके अउ आने-आने प्रयोग के बारे म जानव अउ लिखव, जइसे-  
अ - लाखन-लाखन।

ब - ठाढ़े-ठाढ़े।

- ये पाठ के कविता ह दोहा छंद म बँधाय हे। छंद माने बँधना। छंद ह कई प्रकार के होथे। कोनो छंद म 'मात्रा' के गिनती करे जाथे त कोनो छंद म 'वर्ण' के गिनती करे जाथे। जेमा 'मात्रा' के गिनती करे जाथे,तेला 'मात्रिक छंद' अउ जेमा 'वर्ण' के गिनती करे जाथे,तेला 'वार्णिक छंद' कहे जाथे।

दोहा ह अर्धसम मात्रिक-छंद आय। एकर चार चरण होथे। पहिली अउ तीसर चरण के 13-13 मात्रा के पाछू 'यति' होथे। दुसरइया अउ चौथइया चरण म 11-11 मात्रा होथे। सब मिला के 24-24 मात्रा होथे। मात्रा के गिनती ल 'गुरु' अउ 'लघु' ल समझ के करे जाथे 'गुरु' माने दू मात्रा अउ 'लघु' माने एक मात्रा। गुरु वर्ण के उच्चारण म जादा समय लागथे अउ लघु वर्ण के उच्चारण म कम समय लागथे। जेन वर्ण म कोनो मात्रा नइ रहय या 'इ' अउ 'उ' के मात्रा रहिथे,तेला 'लघु' या एक मात्रा माने जाथे। आने मात्रा वाला वर्ण ल दू मात्रा या 'गुरु' माने जाथे। गुरु के चिनहा 'S' अउ लघु के चिनहा '।' जइसे होथे।

|| | | | S

उदाहरण- कमल, कमला

|| S S S S | ||, || S S S S | = 13+11=24

सब ला देथे फूल-फर,सब ला देथे छाँव ।

|| || S S S | S, | S || | S S | = 13+11=24

अइसन दानी पेड़ के,परो निहर के पाँव ।

पाठ म आय दू ठन दोहा ल लिखके मात्रा के गिनती करव ।

- छत्तीसगढ़ी भाषा म गंज अकन मुहावरा के प्रयोग करे जाथे। एकर प्रयोग ले भाषा के प्रभाव के ताकत बढ़ जाथे अउ भाव म गहराई आ जाथे।

4. खाल्हे लिखाय मुहावरा मन ल अपन वाक्य म प्रयोग करव ।  
मिलखी मारना, मीठ लबारी बोलना, पल्ला मारना ।
5. उल्टा अर्थ वाला शब्द लिखव –  
अँधियार, आसा, लबरा, छाँव, जीत ।
6. जेन शब्द ह संज्ञा या सर्वनाम शब्द के विशेषता बताथे, तेला 'विशेषण' कहे जाथे ।  
जइसे—'गुरतुर गुन' । एमा'गुन'के विशेषता बताय जावत हे । कइसन गुन हे ? ये प्रश्न के उत्तर हवे 'गुरतुर हे' । संज्ञा शब्द के साथ 'कइसे' या 'कइसन' के प्रश्न करे म 'विशेषण'शब्द के पता लग जाथे ।  
पाठ के दोहा मन म आय 'विशेषण' शब्द ल छाँट के लिखव ।
7. पाठ म आय दोहा मन के संदेश उपर दस वाक्य लिखव ।

### योग्यता विस्तार

1. पं. सुंदरलाल शर्मा के खंडकाव्य 'दानलीला' ल पढ़व । ओमा के दोहा ल याद करव ।
2. कबीर दास अउ तुलसी दास मन कइ ठन सिखावन दोहा लिखे हवँय । दूनो के सिखावन दोहा ल लिखव अउ याद करव ।

### टिप्पणी

**गंगाबारू अउ मीत**— छत्तीसगढ़ म एक ठन अइसन परंपरा हे,जेहा आने जघा नइ मिलय,एहा मितानी के परंपरा आय । पारा—परोस के मनखे अउ नता—गोता वाला मनखे मन के आगू म पूजा—पाठ के सँग एक दूसर ल गंगा के बारू या बालू खवाके मितान बन जाथें । ये अइसन नता आय जेहा कई पीढ़ी तक चलथे । अइसने किसम के कई ठन मितानी — परंपरा छत्तीसगढ़ म हवय । जइसे — भोजली, जँवारा, महापरसाद बदे के परंपरा ।

